

Mga Pagpili alang sa Kahangtoran, Bahin 1



Ang akong katuyoan karong gabhiona mao ang pagseguro nga ang inyong mga mata bukas gayod sa kamatuoran nga kini nga kinabuhi *mao* gayod ang panahon nga makahimo kamo og desisyon kon unsa nga matang sa kinabuhi ang *inyong* gusto nga puy-an sa kahangtoran. Karon *mao* ang inyong panahon “sa pagpangandam sa pagsugat sa Dios” [tan-awa sa Alma 12:24; 34:32]. . . .

Ang matag matarong nga pagpili nga inyong himoon dinhi maghatag gayod og dakong kaayohan karon. Apan ang matarong nga mga pagpili sa mortalidad mohatag og mas dakong kaayohan gayod sa kahangtoran. Kon kamo mopili nga mohimo og mga pakigsaad uban sa Dios ug magmatinud-anon niadto nga mga pakigsaad, kamo adunay saad sa “himaya nga idugang diha sa [inyong ulo] hangtod sa kahangtoran” [Abraham 3:26]. . . .

Ang kaaway, siyempre, dili gusto gani nga kamo maghunahuna sa ugma, unsa pa kaha ang kinabuhing dayon. Apan palihog ayaw pagkawalay kahibalo o inosente mahitungod sa mga oportunidad ug mga hagit sa mortalidad. Niana nga diwa, kinahanglan kamo makasabot sa tulo ka sukaranan nga mga kamatuoran nga motabang kaninyo sa pagpangandam sa inyong umaabot nga padulngan: . . .

Una: Hibaloa ang kamatuoran mahitungod kon kinsa kamo. Nagtuo ako nga kon ang Ginoo direktang namulong kaninyo karong gabhiona, ang unang butang nga lyang segurohon nga inyong masabtan mao ang inyong tinuod nga pagkatawo. Hinigugma kong mga higala, kamo literal nga espiritu nga mga anak sa Dios. Gikanta ninyo kini nga kamatuoran sukad inyong nakat-onan ang mga pulong sa “Ako Anak sa Dios” [*Mga Himno*, num. 2]. Apan kana ba nga mahangtoron nga kamatuoran napatik sa inyong kasingkasing? Kini ba nga kamatuoran nakaluwas kaninyo sa dihang nag-atubang og tintasyon?

Ako nahadlok nga tingali kanunay ninyong nadungog kini nga kamatuoran nga kini daw mas sama sa usa ka bansilag [slogan] kay sa balaanon nga kamatuoran. Ug gani, ang paagi nga kamo maghunahuna mahitungod kon kinsa gayod kamo makaapekto sa hapit matag desisyon nga inyong himoon. . . .

. . . *Kinsa man kamo?*

Una ug labing importante, kamo anak sa Dios.

Ikaduha, isip miyembro sa Simbahan, kamo anak sa pakigsaad. Ug ikatulo, kamo disipulo ni Jesukristo.

Karong gabhiona, mangamuyo ako kaninyo nga dili *hulipan* kining tulo ka importante kaayo ug dili mausab nga mga timailhan og laing uban pa, tungod kay ang pagbuhat sa ingon makapugong sa inyong pag-uswag o dili makiangayong mobutang kaninyo sa usa ka naandan [stereotype] nga mahimong mopakgang sa inyong mahangtorong pag-uswag. . . .

Adunay nagkadaiyang timaan nga mahimong importante kaayo kaninyo, siyempre. Palihog ayaw ko saypa sa pagsabot. Wala ako nagsulti nga ang ubang mga titulo ug mga timailhan dili mahinungdanon. Ako nag-ingon lamang nga kinahanglan walay timailhan ang *motangtang*, *mohulip*, o *mag-una sa prayoridad* niining tulo ka malahutayon nga mga titulo: “anak sa Dios,” “anak sa pakigsaad,” ug “disipulo ni Jesukristo.”

Ang bisan unsang timailhan nga dili mobagay niining tulo ka sukaranan nga mga titulo makapasagmuyo kaninyo sa kataposan. Ang ubang mga timaan makapasagmuyo kaninyo sa paglabay sa panahon tungod kay kini walay gahom sa paggiya kaninyo paingon sa kinabuhing dayon diha sa celestial nga gingharian sa Dios. . . .

Ayaw og kasayop niini: Balaanon ang inyong potensiyal. Uban sa inyong makugihon nga pagtinguha, ang Dios mohatag kaninyo og mga pasiplat kon kinsa kamo mamahimo. (Russell M. Nelson, “Mga Pagpili alang sa Kahangtoran” [tibuok kalibotan nga debosyonal alang sa mga young adult, Mayo 15, 2022], broadcasts. ChurchofJesusChrist.org)